



Zur Publikation im Amtsblatt Mittelbünden (Pagina, Pöstli und Novitats) vom Freitag,
11. Mai 2018

Publicaziun uffiziala digl cumegn Albula/Alvra

ALBULA/ALVRA

www.albula-alvra.ch

Infurmaziuns dalla suprastanza communal digl cumegn Albula/Alvra:

Mars / avregl 2018

- Sa basond agl art. 5 alinea 2 dalla lescha d'indemnisaziun digl cumegn Albula/Alvra e siva d'aveir evaluo la lavour impundeida, ò la suprastanza communal fixo igl pensum digl mastral tgi cumpeglia 40% er per igl quart onn d'uffezi.
- La suprastanza communal ò examino e lubia diversas dumondas da biagier.
- An connex cun la determinaziun causala digl „Sbuaditsch a Brienz/Brinzauls“, ò la suprastanza communal surdo las lavours da geolog. La ARGE GeoBrienz SA, Sargans è neida incumbensada d'exequair las lavours da geologia, fasa: procuraziun da basa.
- Igl project da pastgiras ed igl concept da bavradoirs ad Alvagni è nia examino ed approvo. Per la realisaziun digl project propona la suprastanza communal alla proxima radunanza communal da deliberar en credit brut da CHF 575'000.00. Cantun e confederaziun on mess an vista contribuziuns cumuladas an import da 65% digls costs cun dretg da survegnair contribuziuns.
- La suprastanza communal ò examino igl project da rimnada equipaziun ed avertura (SIE 2018) ed igl delibero per mangs dalla radunanza communal digls 25 d'avregl 2018. Igls costs d'investiziun montan CHF 575'000.00. Igl uffezi da gôt e prievels dalla nateira on mess an vista contribuziuns an import da 68%.
- Igls rendachints annuals 2016/2017 digl consorzi da scola Belfort Davains, digl consorzi da scola Val Alvra Dafora e digl consorzi da scola digl scalem superieur Val Alvra èn nias examinos ed approvos..
- Signour Daniel Kunfermann Maissen, sviluppader regional dalla Regiun Alvra, è sa preschentato alla suprastanza communal. Cun chella caschung èn nias preschentos e dilucidos igls „projects current“ scu er las incumbensas.

- Igl contract cun Savognin Turissem an Surses tgi scada alla fegn d'avregl 2018, pertutgont las prestaziuns dalla Carta Ela, è nia prolungo per en onn. Abitantas ed abitants scu er giasts da vacanzas, pon cumprar la Carta Ela e profitar dallas prestaziuns dalla Carta Ela anfignen la fegn d'avregl 2019. An chel connex ò la suprastanza communal approvo en credit an import da CHF 50'000.00.
- La suprastanza ò fixo ed approvo la glista da tractandas ed igl messadi per la radunanza communal digls 25 d'avregl 2018.
- Igl 40. rapport annual 2017 digl register funsil Alvra è nia approvo dalla suprastanza communal.
- La suprastanza communal è neida orientada ed ò piglia cunaschienscha digl project survro pertutgont „Alimentaziun d'urgenza a Vasarauls“, tgi era nia lantschea a sies taimp digl cumegn uriund da Brienz/Brinzauls. A caschung d'ena proxima radunanza communal vign igl project preschento e proponia en credit supplementar correspondent.
- La suprastanza ò incarico la firma Osram AG, da Winterthur, cun la furniziun dallas gleischs per las veias.
- Agl club da hockey da Surava è nia concedia en amprest da CHF 25'000.00 per la compra d'ena nova banda scu er per igl mantignamaint dall'infrastructura segl plaz da hockey.
- La suprastanza communal ò delibero en credit da CHF 84'000.00 per ramplazzar dus punts marschas tgi magnan alla ruigna da Belfort. Las maseiras da ramplazzamaint vignan exequidas igl matg 2018 antras igl menaschi d'ovra Alvra.

Infurmaziun dalla radunanza communal digls 25 d'avregl 2018

- La lescha d'ustareia digl cumegn Albula/Alvra è nia approvo da votantas e votants sainza cuntervusch.
- Per la realisaziun digl concept da pastgiras e bavradoirs ad Alvagni on igls votants approvo en credit brut da CHF 575'000.00. Resalvond la posiziun digl Uffezi federal per agricultura pon neir mess an vista contribuziuns cumuladas an import da 65% digls costs cun dretg da survagneir contribuziuns.
- Igl project da rimnada equipaziun ed avertura 2018, Veia da gôt Fops, Casti, è nia approvo. Igl credit brut tgi era necessari persiva, an import da CHF 575'000.00, è nia approvo digls votants. Igl Uffezi da gôt e prievels dalla nateira on mess an vista contribuziuns an import da 68%.
- Votantas e votants on approvo en credit brut da CHF 335'000.00 per la realisaziun digl concept d'economisaziun digl rusment „Molok“. Ainten l'amprema etappa duessan neir installos igls posts da rimnada a Casti e Brienz/Brinzauls ed ainten en'ulterioura etappa igls posts da rimnada ad Alvaschagn, Mon e Surava.
- Igls votants èn nias infurmos dalla terminaziun dalla sanaziun dalla Veia Cumpogna (chint final) a Casti.